

OKUMUMETHWEKO

URhulumende Uphuma Ipi Yokulwa Nokuvuza Kwamanzi

Chris Bathembu

U-Cynthia Ncapayi weBhayi, ePumalanga Kapa, wethuke kumbi lokhuya incwadi kamasipaladi yokubhadala amanzi nayitjengisa ukuthi ukwelela imali engaphezulu kwama-R70 000. UNcapayi ungumma okhulisa abantwana ayedwa, orhola imali engaphasi kwee-R200 000 ngomnyaka. Bekasazi kuhle ukuthi abantwabakhe ababili bebangeze basebenzise amanzi wemali enengi kangako, ngoba akanayo negiza, akanabhadhi namkha itjhawari.

Kuthe nasele kuphenywa kwatholakala ukuthi umraro kaNcapayi kukuthi uvuzelwa mamanzi naye, njengoba lomraro sewumraro emalokitjhini amanengi weSewula Afrika nje. Abomakhelwana bakhe abanengi eenya-nganeni eziphelileko balile ngokuthi amanzi selabadurela khulu; kutholakele ukuthi lokho kubangwa kuvuza kwamaphayiphu nempompi eziphukileko.

Umnyaka nomnyaka iSewula Afrika ilahlelelwa yimali elinganiselwa ku-R7 yamabhiliyoni ngenca yokuvuza kwamanzi; lokhu-ke kutjho ukuthi iSewula Afrika idleka khulu ngomraro wokuvuza kwamanzi. Lawa-ke mamanzi angabe asetjenziswa ziingidi ngeengidi zemikhaya enganazo izenzelwa ekuphilwa ngazo ezinjengokuphakelwa amanzi nemisebenzi yoku-hlwengisa.

Kodwana-ke ihlelo elitjha lokulonda amanzi eliphasiswe yiKhabinethi kulindeleke bona lilondele iSewula Afrika iingidi ngeengidi zamalitha wamanzi alahleka angakasebenzi. Mhlaphanje uMengameli u-Jacob Zuma uvule ihlelo lePi YokuLwa NokuVuza KwaManzi eBhayi; lehlilelo-ke lizokuthwasisele umsebenzi abantu abazii-15 000, abama-athizeni, iintshinywa ezizakusebenza ngamanzi namaplambara azakulungisa iimpompi namaphayiphu avuzako eendaweni zemakhabo, njengendlela yokukhuthaza ukubabalelwa kwamanzi.

Lokhu-ke kwenzelwele ukuqinisekisa ukuthi iKoro yezaManzi nezeHlwengiso ihloma ngabantu abanamakghonofundwa namandla wokunciphisa ukulahlekelwa mamanzi eSewula Afrika.

UNgqongqotjhe wezaManzi nezokuHlwengisa uNomvula Mokonyane selayikhethile i-Rand Water ukuthi iphumelelise iPi YoKulwa NokuVuza KwaManzi.

“Ekulumenakhe yoBujamo beNarha, uMengameli ulile ngamanzi wemali enengi, engaphezulu kwama-R7 wamabhiliyoni wamarandi iSewula Afrika elahlekelwa ngiyo ngamanzi avuza eempompi, ngenca yokuluphala komthangalasisekelo. Kukhonake namanye amanzi angaziwako ukuthi atjhi-ngaphi, esi-ngawaziko ukuthi manengi kangangani. Ngenca yalokho-ke uMengameli ubawe umNyango ukuthi uze namaqhinga



UMengameli u-Jacob Zuma, obonakala lapha anoNgqongqotjhe wezaManzi nezokuHlwengisa uNomvula Mokonyane, uvule ihlelo lokulonda amanzi elizakubuye godu livule namathuba wokuthwasisele iinkulungwana ngeenkulungwana zabantu abatjha imisebenzi.

wokurarulula lomraro,” kutjho uNgqongqotjhe uMokonyane.

“IPi Yokulwa NaManzi Avuzako ayizukugcina ngokulonda amanzi nje kwaphela, kodwa izakunikela neenkulungwana ngeenkulungwana zabantu abatjha beSewula Afrika amathuba wemisebenzi ebambelako ngokubenza ama-athizeni, amaplambara kunye neenqhemba zomsebenzi eziqalene namanzi ezizakusebenza kibomasipaladi abakhonjiweko,” kutjho uNgqongqotjhe.

Umsebenzi wokufundisela abantu abatjha umsebenzi uzakwenziwa ngeengaba ngeengaba; isigaba sokuthoma kulindeleke ukuthi sidose abantu abatjha abalinganiselwa ee-3 000, ngesigaba sesibili kulandele aba-5 000, bese kuthi aba-7 000 bathwasise ngesigaba sesithathu ngomnyaka weemali wee-2017/18.

UMengameli uZuma uthe nakakhuluma eBhayi la ihlelwele livulelwe khona ngokusemthethweni, wathi iinqhemba zomsebenzi eziqalene namanzi zizakulungisa iimpompi namaphayiphu, zifakele nethetkoloji etja emahlelweni wamanzi amadala, zibuye zifakele nokutjha kilokho esele kuphelile namkha kuluphele emahlelweni wamanzi.

Iinqhemezi-ke zizakuba kibo boke abomasipaladi kile loke ilizweli.

“Umlayezo wethu omkhulu kini kukuthi

kufuze silonde amanzi. Amanzi akasimthombo ongatjho! Nakube asiwababaleli, siwalonde, ngelinye ilanga sizakugcina singasenawo. Soke nje sihlala sibona amanzi avuza eempompi nemaphayiphini eentradeni nemakhaya.

“Amanzi asilahlekelako la asilahlekelako ngeendlela ezihlukahlukileko, njengangemithangalasisekelo engaphasi komhlaba, ngeensetjenziswa eziphukileko nezingalungiswa kuhle kunye nangomthangalasisekelo osele ubanjwa kuluphala,” kutjho uMengameli.

Abomasipaladi nabo se bathomile ukusebenza ngamaphrojekthi amakhulu wokuvuselela umthangalasisekelo, khulu khulu amaphayiphu avuzako. IPi YokuLwa NokuVuza KwaManzi izakuqinisa umsebenzi umNyango wezaManzi nezokuHlwengisa kunye nabomasipaladi esele bathomile ukusebenza ngawo ukuvuselela amaphayiphu aphukileko nomnyaka umthangalasisekelo, kuhlathulula uMengameli Zuma.

URhulumende ubekele ngeqadi imali engange-R680 yeengidi kilomnyaka weemali ophuzulu.

UNgqongqotjhe uMokonyane uthi bama-27 abomasipaladi beeyingi ebebasemirarweni emikhulu elizweneli ngamanzi.

“Ngokusebenzisana namabhodi wezamanzi, sizakufundisa ilutjha ngokulithwasisele ilwazi lomsebenzi eliphathelene nokusiza ngokuqalelela iindaba zamanzi, silinikele incwadi zomsebenzi

esizabe silifundise wona ngama-SETA. Lelo lutjha elizabe selithole iincwadezo lizakufakwa emabhodini wezamanzi ngokuhlukahluka kwawo, ngaleyindlela-ke sizabe sandise ikghonofundwa lokuqalelela zamanzi,” kutjho uNgqongqotjhe uMokonyane.

UMokonyane ungezelela ngokuthi abantu abatjha abanengi bazakufakwa nakibomasipaladi beenyngi la kufuneka khona amagadango wokusiza ngeendaba zamanzi.

USodorobha we-Nelson Mandela Bay, u-Danny Jordaan uthi i-Nelson Mandela Metro, ebalanomaMasipaladi weBhayi, noweTinarha kunye nowe-Dispatch, isiphande esisesomisweni samanzi.

“Siqalene nomraro omkhulu; kungenca yalokhu-ke ukuthi sithethe isiqunto sokuthatha amagadango wokubabalela amanzi nje ngomthombo wepilo oqakatheke khulu kilesisiphande. Sithokozile ukubona uMengameli eze lapha ekhethu azokuvula lehlilelo lokulwa ipi yokulahlekelwa mamanzi,” kutjho u-Jordaan.

“Endaweni yekhethu njengedrobha elikhulu, kufuze silwe nomraro wokuvuza kwamanzi. Imalikazi eyesabekako abantu ekufuze bayibhadalele amanzi ayibangwa kukuthi abantwabo basebenzisa amanzi amanengi khulu, kodwana ibangwa kukwehluleka kwabomasipaladi ukuthanyela umraro wokuvuza kwamanzi,” kutjho u-Jordaan.

LONDA AMANZI: KUTHOMA NGAWE

Qobe mnyaka urhulumende ulahlekelwa mabhiliyoni ngamabhiliyoni wamarandi ngenca yokuvuza kwamanzi, kodwana nanyana sekuvulwe ihlelo lokulwa nomraro lo nje, kusemandleni wethu soke ukulonda elinye nelinye ithosi lamanzi.

Ukulonda amanzi kuqakathekile phezu kwebhoduluko lendawo. Kulekelela ilizwe ukulwa nokuthayela kwamanzi, begodu kungakulondela imali. Nje-ke i-Vuk'uzenzele ikulethela iinyeleliso ezingaba lisizo elikhulu ngokulonda amanzi.

IINDLELA ZOKULONDA AMANZI EKHYA



- Lokhuya nawugeza ubuso, amazinyo namkha nawutjhefako, musa ukuvulela ipompi isiphelani.
- Nawenyula ukududela ngebhadini, ungagcwalisami amanzi ngebhadini.
- Ukududela ngebhadini kungathatha amanzi ama-80 wamalitha ukuyokufika e-150 lamalitha ibhadi ngayinye.
- Linganisa amanzi ozowasebenzisa kwa-

phela nawubilisa ngeketlela, ungabilisi amanzi adlula lawo owafunako. Lokhu-ke kuphungula nemali ozayibhadelela igezi oyisebenzisako.

- Ungagcwalisami amanzi aphuphume ezitjeni namkha eempotweni opheka ngazo, ngoba lokhu kungenza ukuthi usebenzise igezi enengi khulu ukufuthumeza namkha ukubilisa amanzi layo.
- Lungisa ithoyilethi evuzako, nakungasinjalo ingahle igcine isebenzisa amanzi angabe afike e-100 000 zamalitha ngomnyaka munye.
- Balekela ukuflatjhela ithoyilethi butjhwileni. Amatjhitjhu, iinunwana nokhunye okulahlwako kungcono uku-



- lahle emgqomini weenzini kunobanyana ukuflatjhe ethoyilethi. Khumbula phela ukuthi kusebenza i-12 yamalitha wamanzi qobe uflatjha ithoyilethi.
- Sebenzisa amanzi esekhe asebenza – ebeniduda ngawo, ebenivasa ngawo nebeni-

wasebenzisela okhunye – ukuflatjha ithoyilethi.


- Sebenzisa ithunga ukugeza umodoro wakho kunobanyana usebenzise ithumbu. Nakube ukatelekile ukuthi usebenzise ithumbu, sebenzisa isipreya ozakunande usicima hlangana namahl-andla wokuvulela amanzi nawugeza umodoro.



- Abalimi nabafuyi kufuze benze iqiniso lokuthi iinhlaha zokubulala iinunwana bazibeka kude nalapho kuvela khona amanzi nemilambo.
- Umlambo neligu lomlambo akusindawo yokuphumela; akusithoyilethe!
- Nawubona umuntu asilaphaza amanzi, fowubona i-Blue Scorpions ku-: 0800 200 200.

IINDLELA ZOKULONDA AMANZI ESIVANDENI

- Thelelela iintjalo zakho ekuseni khulu namkha ntambama ngoba ngalezonkathi kupholile. Ukusukela nge-10:00 ukuyokufika nge-15:00 umuntu angalahlekelwa mamanzi angabe afike ema-90% ngokurhwamuka.
- Qho nawuqeda ukupheka amaqanda, amanzi owapheke ngawo abeke, uzakuthelela ngawo iintjalo zakho zangekhaya nasele aphilile. Phela iintjalo zizuba okukhulu kuzakhamzimba eziphuma eqepheni.
- Isivande sakho ungasitheleleli soke isikhathi, kodwa sithethelele kwanele. Ukuthelelela ngethumbu kungasebenzisa amanzi angabe afike ema-30 wamalitha ngomzuzu.
- Namanzi wezulu nawo aba lisizo elikhulu nawuwa-bekelelako bese uthelelela ngawo-sivande.



OKUMUMETHWEKO

Thandeka Ngobese

Kunenzuzo Ukukhuthala

U-Angelina Masuku, onama-41 weminyaka ubudala, odabuka KwaHlabisa, etlhagwini yaKwaZulu-Natala, usibonelo esiphilako esifakazela ukuthi ukukhuthala nokuzinikela zona zakho eziphambili zokuphumelelisa amabhudango.

Azange aqede esikolweni, kodwa uMasuku usebenzisa ikghonofundwa lakhe alifunda asesemncani lokweluka imimantji, neentulo, neengejiso zokuhlobisa ezilengiswa ebodeni, iintafulana zamabhokisana wejuwelari kunye nemimantji emikhulu. Ipahla ayenzako le ithengiselwa e-Atlanta, e-United States of America, ne-Disneyland.

Ukudlula lapho, uMasuku ufundisa abomma nelutjha elingasebenziko ukuthi nabo bakwazi ukuzondlela abantwabo.

UMasuku utjele i-Vuk'uzenzele ukuthi uyise wabhubha afunda uGreyidi 10. Ukusukela lapho-ke unina azange asakhona ukumfundisa ukuya phambili ngoba angasenamali, ngalokho-ke wagcina asililise isikolo. Wahhala nokgharyakhe owamfundisa ukuluka imimantji, angazi ukuthi ngelinye ilanga ipahla ayilukako leyo izakhe ifunwe iphasi loko.

"Ngafundisa nabodadwethu abane nabantwabami lelikghonofundwa ukghari angafundisa lona. Sasiithengisela ikampani esebenza ngomsebenzi wezandla, Ilala, ngephalethu ebuya eHluhluwe. Ngomnyaka wee-2006 ngaya e-African Art Centre e-Durban. Bathi bangabona umsebenzethu bawuthanda kwamambala, sabe sathoma ukubenzela. I-African Art Centre yangivulela iminyango, yabe yangilekelela nokuthi ngingenele iphaliswano lomSebenzi weZandla. Kilelophaliswano ngathola unongorwana wokuthoma nowesibili ngomsebenzi enganginele ngawo iphaliswano, ngathumba i-R50 000," kutjho uMasuku.

Ukusuka lapho-ke uMasuku wavulekelwa ngeminye iminyango, wabe wathoma wathola iimemo ezivela e-Germany, ne-Italy nakamanye amazwe, ayememela ukuthi ayokubukisa ngomsebenzakhe.

Ngomnyaka wee-2008 waya ku-Ejensi yokuThuthukiswa kwamaBhizinisi amaNcane wayokubawa isizo lokulekelwa ukuzivulela yakhe ikampani. Namhlanjani-ke selathengisela i-South African Lifestyle Hub e-Atlanta ne-



U-Angelina Masuku (ophambili), nesiqhema sakhe esimlekelela ukuphumelelisa isivumelwana sokuthengisa se-Disneyland.



U-Angelina Masuku nenye yepahla ayenzako.

Disneyland ngemimantji engaphezulu kwama-200 ngenyanga.

Isikela likaNgqongqotjhe lezokuThuthukiswa kwamaBhizinisi amaNcane u-Elizabeth Thabethe wavula ngokusemthethweni indawo yasafuthi yokubukisela ipahla yeSewula Afrika e-Atlanta ngomnyaka wee-2013, ngomnqopho wokusiza ukumaketha ipahla ekhandwe lapha eSewula Afrika, nokukhona kalisa amathuba weemakethe wamazwe ngamazwe ebantwini abanekghono lomsebenzi wezandla nabosomabhizinisi abasakhasako.

Ukusebenzisana nomNyango wezobuKghwari namaSiko ngaphasi kwesandla seSekela likaNgqongqotjhe u-Rejoice Mabudafasi kuveze umphumela omuhle la abosomakghonofundwa balapha ekhethu bavulekelwe khona lisekelo elinabileko eliqinisekisa ukuthi bathola ukusekeleka abakudingileko ukungena eemakethe zamazwe ngamazwe.

UMasuku uthi ama-oda we-Atlanta afakwa ngekhatologu athunyelwa amakhastama anakareko, kanti-ke unabomma abama-25 abamlekelela kiwo woke umsebenzi lo.

"Amakhastama nakaqanda ukungibhadala ngibanikela imali yemimantji abayenzileko.

Njenganje ngisaphethene namalungiselelo wokuthoma ukuthengisela e-United Kingdom. Ngizokufuna ezinye izandla ukungilekelela ukuphumelelisa leyo i-oda nasele siqedile ngamalungiselelo wakhona," kutjho uMasuku.

UMasuku uthi imimantji yakhe uyiluka ngomhlobo womgaba ekuthiwa yibhambu, bese uyigwala ngezinto zokugwala zemvelo.

"Ngikholwa ukuthi ukwenza ipahlethu ngezinto zemvelo kusandisela amakhastama," utjho uyahlathulula.

Silula isiyeliso sikaMasuku kabanye abosomabhizinisi.

"Ungesabi ukuthoma ibhizinisi. Ukuthi awukafundi namkha ukuthi ufunde kancani akukafaneli ukuthi kube siqabo kuwe. Anginantifiki zefundo kodwana ngiyakghona ukuya ngaphetjheya ngiyokwenza iimvumelwano zebhizinisi. Ungesabi ukubawa isiluleko, sizakusiza ngokukuhlomisa ngelwazi," uyayelelisa.

UMasuku uthi labo abanekareko kumakghonofundwa wokwelula imimantji bangamthumela i-imeyili kilesisiphande se-imeyili: angelina.masuku@gmail.com namkha bamfowunele enomborweni ethi: 072 109 9329

Ukuphepha Phambili

Njengoba ilizwe lekhethu liqale ezinye iindlela zokupheka namkha zokwenza ukuthi amakhaya ahlale afuthumele ukube ngahlanye kulondwa igezi, i-Vuk'uzenzele ikulethela iinye lezinto zokuhlala uphephile nawusebenzisa ipharafini namkha irhasi namkha igezi. **Nawusebenzisa ipharafini:**

- Ipharafini sebenza ngayo ngokutjheja nokuyelela ngaso soke isikhathi, ngoba iyitjhefu, futjhi ingasitjhisisa isikhumba sakho ngitjho nanyana ingakalunyathiswa.
- Ungathomi utjhiye isisetjenziswa sepharafini singakatjhejwa. Kuthatha umzuzwana munye nje tere ukuthi isisetjenziswa sepharafini esivuthako siketulwe mummoya, namkha siketulwe sifuywasithandwa, namkha siketulwe mntwana.
- Yenza iqiniso ukuthi iinsetjenziswa zepharafrini zihlezi zinzizile endaweni ethabaleleko.
- Ungathomi ufake itjhila ngaphasi kwesisetjenziswa sepharafrini. Umntwana namkha isifuywasithandwa angase adose itjhilelo litjhe, libaselele umlilo okhanyiswe sisetjenziswa sepharafrino.
- Hlala unomgqomo wesanda eduze nawusebenzisa isisetjenziswa sepharafrini. Phela amanzi akawucimi umlilo wepharafrini, begodu angawuthuwelelisa ngokurhatjha amalanganabi.

Kusetjenzwa Njani Ngokuphepha Ngerhasi



Khambisa isilinda ijame rwe, ingalali



Sebenzisa endaweni ebetha ummoya ngokwaneleko



Uvula ngokuthungela ntanzi bese ukhona uvulela irhasi



Ipoti ibeke ngendfeta efaneleko phezu kwesitofu



Tjheja uyelele nawupheka ngamafutha, gubuzesa ipoto/ipani ngetjhlila ukuvimbela ukulumatha komlilo



Valisisa ngemva kokupheka



Nukelela uzwe ukuthi akunarhasi evuzileko na

Umthombo: www.total.co.za

Ilutjha Lithola Isisombululo Sokulonda Igezi

Noluthando Mkhize

Liyanda ilutjha leSewula Afrika elivela neensombululo zokurarlula imiraro elihlangabezana nayo woke malanga emphakathini.

Omunye walabobantu abatjha nguLuthando Msomi, onama-23 weminyaka ubudala, ovela eMlazi, e-Durban, KwaZulu-Natala. UMsomi uvele nombono wesitofu esiphathwako, esingenye indlela yokupheka ngaphandle kokubasa eziko, nangaphandle kokusebenzisa irhasi, nangaphandle kokusebenzisa igezi.

Isitofesi usibasela ngeenkuni ukuthi umlilo opheka ngawo ungacimi.

"Ngalimuka ukuthi abantu abahlala emikhukhwini babasa emaziko, manje-ke ukubasa eziko akusinto ephiphileko. Ebusika imikhukhu ilumatha lula, ithungelelane; kesinye-ke isikhathi imililo enjalo ibangwa mililo ebaswa phasi eziko."

"Ngangifuna ukuthola isisombululo sokusombulula imiraro yethu abantu abanzima e-Afrika. Kwasukela lapho-ke ukuthi ngicabange ngokuthi kghani angeze ngakhanda isitofu esihlukileko kezinye iintofu na. Ngawuthola njalo-ke lomqondo wesitofu esihlukileko."

Njengoba iSewula Afrika inemiraro yegezi nje, uMsomi uthi sekusemandleni wamaSewula Afrika, khulukhulu ilutjha, ukuthola iinsombululo emirarweni neentjhihlweni ezikhona.

Nje-ke isitofu sakhesi esiphathwako, sibubhadekelo ngeenkunzi zokuqinteliswa kwegezi okuqhelileko amalanga la.

Lesitofu esitjha sithathelwe emhlobeni wesitofu ebesele vele sikhona, kodwana umehluko lapha kukuthi sona asiyisebenzisi irhasi.

"Eminye imihlobo enjengalesitofu mihlobo yetheknoloji ephezulu khulu; nje-ke mina bengifuna umhlobo ozakuba yindlela elula, uwasebenzele lula amaSewula Afrika."

Ingqondo yokusungula isitofu esitjha yangifikela ngomnyaka wee-2013, ebhizinisini kaMsomi, Iziko Enterprises.

"Isitofesi senziwe ngegatoro yepende eyi-5-litha, yawedelwa ngesimbi. Sifaka iinkuni



ULuthando Msomi nesitofu sakhe esiphathwako.

ngegatorweni nasiphemba umlilo. Intuthu ithunya itjhe phezulu, ngokunjalo nelanganbi lomlilo nalo livuthe liye phezulu; lokho-ke kuyindlela ephiphileko yokuvutha komlilo ngoba uvinjwe yigatoro ovutha ngaphakathi kwayo. Ipotwako-ke uyibeka phezu kwegatoro."

UMsomi, osiphathiswa sezokuthintana eYunivesithi yaKwaZulu-Natala (i-UKZN) nowafunda khona kileyunivesithi, uthi linengi isizo alithole kiyo iyunivesithi le ukwakha lesitofu esitjha.

"Ngikhulumisene nabafundi bomnyango wezobunjiniyera neminye iminyango khona eyunivesithapha, bangilekelela ukwakha isitofesi kobanyana ngizophumelelisa umqondo ebenginawo ube yinto yamambala esebenzako."

Uthe angaqeda ukusikhanda isitofesi uMsomi, wathoma ukusithengisa nge-R120 ngasinye.

"Lokhu-ke kwenziwa eegabeni zokuthoma zokukhandwa kwalesitofu. Ngangifuna ukubona ukuthi abantu bazasithenga na. Basithokozela! Saya neentolo ezikulu sayokulinga nakhona ukuthi bangasithengisa na, nangambala

nabo basithokozela."

UMsomi anjalo nje ubuye abe mthumbe kanongorwana wephaliswana, i-Inkunzi Isematholeni Youth in Business Competition, eliphethwe yi-Ithala Bank; unongorwana amthumbleko ngowee-2014/2015. I-Ithala Bank ngekarhulumente wesifunda.

"Ngethukile nangizwa ukuthi ngithumbile ephaliswaneni. Nangithoma ibhizinisi le ngangingakaqali ukwenza inzuzo. Ngangiphethwe kukuthi sinomraro, kufuneka isisombululo sawo. Manje-ke sengiyabona ukuthi lesosisombululo singingenisela nemali, okuyinto ethakasisa kwamambala."

Uthi usathuthuka ngokusikhanda isitofu sakhesi, usaphenya nokuthi angeze saba nangozi yepilo na, ulinga nokuthi siphasiswe liZiko leKhwalthi leSewula Afrika (i-SABS).

UThuli Galelekile, omPhathi wezokuThintana nezokuMaketha e-Ithala Bank, uthi uMsomi bazomlekelela ngokuphenyisisa ukuya phambili ngesitofu asisungulilekwesi, bamlekelele nangokutlama iPlani yeBhizinisi kunye nangokusekela ngeemali umqondo webhizinisi.

"Iphaliswana lelutjha ngezamabhizinisi ekuthiwa yi-Inkunzi Isematholeni ligadango esikholwa ukuthi lingafaka ummoya wobubhizinisi hlangua nelutjha. Iyiphrojekthi esele ithomile ukufaka ummoya wokucabanga ngokusungula izinto ezitjha zokubabalela nokuphepha ummoya webhoduluko uhlele umuhle uphephile hlangua nelutjha elingasebenziko."

UMsomi uthi ngomuso ucabanga ukungena ngokupheleleko awenzele safuthi umsebenzi wamabhizinisi womphakathi.

"Njenganje ngilinga ukhloza imali nokuthola umuntu ongaba ngutjhere wami ngezamabhizinisi. Ukulondwa kwegezi yindaba eliqalontanzi eSewula Afrika. Kuqakathekile ukulonda igezi nokuthola iinsombululo eendleleni zamandla weembaseli ngaphandle kokusilaphaza ummoya webhoduluko," uyangezelela.